

MALAYSIA

DEWAN RAKYAT

ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI SELASA, 3 NOVEMBER 2015, PUKUL 10.00 PAGI

Bil. 47

PERTANYAAN-PERTANYAAN BAGI JAWAB LISAN

1. PR-1333-L71133
Tuan Anuar bin Abd. Manap [Sekijang] minta **MENTERI BELIA DAN SUKAN** menyatakan tahap persediaan serta langkah-langkah yang diambil dalam proses perubahan takrifan umur belia yang akan dikurangkan kepada 30 tahun menjelang pelaksanaannya pada tahun 2018.
2. PR-1333-L71193
Tuan Mohd Rafizi bin Ramli [Pandan] minta **PERDANA MENTERI** menyatakan senaraikan semua projek pembinaan masjid di bawah MAIWP atau JAKIM sejak 2010 hingga kini berserta maklumat kontraktor dilantik, maklumat pembida lain dan nilai kontrak yang dianugerahkan bagi setiap projek.
3. PR-1333-L69668
Datuk Juslie bin Ajirol [Libaran] minta **MENTERI PENDIDIKAN** menyatakan :-
 - (a) usaha-usaha strategik bagi negeri Sabah yang mendapat mandat menambah jumlah guru dari kalangan anak tempatan kepada 90 peratus daripada keseluruhan tenaga pengajar di sekolah dalam tempoh tiga tahun akan datang; dan
 - (b) bilakah pelaksanaan SMK Gum Gum 2 dan SMK Libaran.
4. PR-1333-L71047
Puan Teo Nie Ching [Kulai] minta **MENTERI PEMBANGUNAN WANITA, KELUARGA DAN MASYARAKAT** menyatakan bilangan kes yang didakwa dan dijatuhkan hukum di bawah Akta Kanak-Kanak 2001.
5. PR-1333-L69881
Datuk Dr. Makin @ Marcus Mojigoh [Putatan] minta **MENTERI PERTANIAN DAN INDUSTRI ASAS TANI** menyatakan :-
 - (a) berapa banyakkah jumlah bot menangkap ikan laut dalam yang beroperasi di negara ini; dan

- (b) di mana mereka berpangkalan dan berapakah jumlah syarikat bot laut dalam ini dimiliki oleh kaum Bumiputera.
6. PR-1333-L70214
Dato' Ngeh Koo Ham [Beruas] minta **MENTERI PERUSAHAAN PERLADANGAN DAN KOMODITI** menyatakan kenapa harga getah dan kelapa sawit menurun dalam nilai ringgit juga sungguhpun komoditi-komoditi tersebut dijual dalam Dolar Amerika (USD) yang telah meningkat nilai secara mendadak berbanding dengan Ringgit Malaysia (RM). Nyatakan tindakan-tindakan yang akan diambil untuk memulihkan harga komoditi-komoditi ini.
7. PR-1333-L71269
Datuk Wee Jeck Seng [Tanjong Piai] minta **MENTERI KERJA RAYA** menyatakan apakah garis panduan bagi *East Valley Expressway (EKVE)* bagi mengatasi masalah kesesakan lalu lintas dan adakah laporan penilaian alam sekitar (EIA) yang disediakan sebelum ini termasuk tinjauan penduduk di kawasan itu.
8. PR-1333-L71318
Tuan Zairil Khir Johari [Bukit Bendera] minta **MENTERI SUMBER ASLI DAN ALAM SEKITAR** menyatakan bilakah semua gading yang disimpan dalam "stockpile" Kerajaan akan dimusnahkan seperti yang dijanjikan dan sama ada ia akan dimusnahkan secara terbuka.
9. PR-1333-L69849
Dato' Othman bin Aziz [Jerlun] minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan langkah proaktif yang telah dijalankan bagi pelaksanaan Kempen Beli Barangan Buatan Malaysia khususnya bagi membantu mengawal pengaliran Mata Wang Ringgit dalam negara ekoran penurunan Ringgit pada masa kini.
10. PR-1333-L69924
Puan Alice Lau Kiong Yieng [Lanang] minta **MENTERI KESIHATAN** menyatakan usaha yang telah diambil dan akan diambil untuk meningkatkan mutu perkhidmatan di Hospital Sibul, Poliklinik Oya dan Poliklinik Lanang (Sibu) kepada pesakit-pesakit kerana pada masa ini mereka terpaksa menunggu giliran yang lama sebelum diberikan rawatan serta bilakah Poliklinik Sibul Jaya akan mula berfungsi.
11. PR-1333-L69701
Datuk Dr. Ewon Ebin [Ranau] minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan :-
- (a) keberhasilan subsidi pengangkutan darat luar bandar di negeri Sabah dalam menangani isu kenaikan harga barangan di negeri tersebut; dan
 - (b) usaha-usaha lain yang dibuat oleh Kementerian dalam memantau kenaikan harga barangan terutama sekali di kawasan pedalaman negeri Sabah.

12. PR-1333-L71049
Tuan Su Keong Siong [Ipoh Timor] minta **MENTERI DALAM NEGERI** menyatakan sebab-sebab kedai-kedai judi Internet haram semakin berleluasa di seluruh Malaysia walaupun Menteri dan Ketua Polis Negara telah berjanji akan membanteras dan menghapuskan sindiket judi internet haram ini dan nyatakan jangka masa yang diperlukan untuk menangani masalah ini.
13. PR-1333-L69643
Tuan Khoo Soo Seang [Tebrau] minta **MENTERI TENAGA, TEKNOLOGI HIJAU DAN AIR** menyatakan apakah langkah jangka panjang yang dilaksanakan oleh Kementerian untuk memastikan bekalan air mencukupi selain daripada melakukan pembenihan awan.
14. PR-1333-L70136
Ust. Datuk Dr. Mohd. Khairuddin bin Aman Razali [Kuala Nerus] minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan tindakan Kementerian bagi mengekang *trend* kenaikan harga barangan khususnya pada musim perayaan serta alternatif yang dimiliki rakyat ketika berhadapan dengannya.
15. PR-1333-L70706
Datuk Seri Noh bin Haji Omar [Tanjong Karang] minta **PERDANA MENTERI** menyatakan berapakah peruntukan yang telah dibelanjakan di negeri Selangor bagi setiap bidang dalam Bidang Keberhasilan Negara (NKRA).
16. PR-1333-L69586
Dr. Michael Jeyakumar Devaraj [Sungai Siput] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan syarat-syarat berkaitan tawaran "*Matching Grant*" dengan nisbah 9:1. Adakah Jawatankuasa Pengurusan Rumah-Rumah Pangsa diberi ruang untuk memutuskan jenis "*repair*" yang diingini dan memilih kontraktor untuk melakukannya.
17. PR-1333-L69507
Dato' Wira Othman bin Abdul [Pendang] minta **MENTERI KEWANGAN** menyatakan apakah Kerajaan bercadang untuk menggunakan hasil kutipan GST bagi membantu rakyat yang terjejas dengan kemerosotan ekonomi. Apakah bentuk bantuan yang dicadangkan.
18. PR-1333-L69652
Dr. Che Rosli bin Che Mat [Hulu Langat] minta **MENTERI KEWANGAN** menyatakan perkembangan terkini pembangunan MRT mengikut fasa dari Sungai Buluh ke Kajang dalam memberi perkhidmatan sistem pengangkutan awam yang cekap dan terbaik.
19. PR-1333-L70794
Datuk Aaron Ago anak Dagang [Kanowit] minta **MENTERI KOMUNIKASI DAN MULTIMEDIA** menyatakan status dan kejayaan perlaksanaan Internet Bestari bagi semua sekolah di luar bandar Sarawak dan Sabah. Apakah strategi Kerajaan bagi mengatasi masalah "*Internet connectivity*" di kawasan luar bandar Sarawak dan Sabah.

20. PR-1333-L71073
Tuan Teo Kok Seong [Rasah] minta **MENTERI PENDIDIKAN** menyatakan :-
- (a) bilakah Kerajaan Pusat akan mengikut langkah Kerajaan Negeri Sarawak yang mengiktiraf Sijil UEC; dan
 - (b) mengapakah sehingga kini, sijil UEC masih tidak diiktiraf oleh Kerajaan Pusat.
21. PR-1333-L70949
Dato' Abd. Aziz bin Haji Sheikh Fadzir [Kulim Bandar Baharu] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan apakah langkah segera untuk memastikan setiap pili bomba di setiap unit perumahan di Kulim Bandar Baharu terutamanya dapat berfungsi supaya langkah awal dapat diambil ketika berlaku kecemasan atau kebakaran.
22. PR-1333-L70958
Tuan Ramkarpal Singh a/l Karpal Singh [Bukit Gelugor] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan langkah-langkah yang diambil untuk mengawal harga-harga yang ditetapkan oleh pemaju hartanah dalam penjualan rumah-rumah kediaman untuk mengelakkan harga-harga rumah kediaman tersebut daripada terus meningkat sehingga rakyat berpendapatan sederhana tidak mampu memilikinya lagi.
23. PR-1333-L70386
Dato' Haji Abdul Rahman bin Haji Mohamad [Lipis] minta **PERDANA MENTERI** menyatakan prestasi terkini ekonomi Malaysia memandangkan timbulnya pelbagai spekulasi dan persepsi negatif dalam kalangan rakyat.
24. PR-1333-L70260
Tuan M. Kulasegaran [Ipoh Barat] minta **PERDANA MENTERI** menyatakan :-
- (a) adakah undang-undang akan digubal semula untuk tujuan pemansuhan hukuman mati. Jika tidak, mengapa; dan
 - (b) nyatakan dan senaraikan mengikut tahun jumlah mereka yang telah dihukum mati oleh mahkamah dan digantung hingga mati sejak tahun 1957- 2015.
25. PR-1333-L70725
Datuk Noor Ehsanuddin bin Mohd Harun Narrashid [Kota Tinggi] minta **MENTERI KEWANGAN** menyatakan apakah langkah-langkah yang telah diambil oleh Kerajaan untuk memaksimumkan simpanan rakyat Malaysia di hari tua.

26. PR-1333-L70284

Dato' Fauzi bin Abdul Rahman [Indera Mahkota] minta **MENTERI KEWANGAN** menyatakan apakah Kementerian bersedia *divest* semua kepentingan perniagaan Kerajaan, kecuali industri strategik seperti Petronas. Kerajaan perlu kembali hanya kepada pemerintahan dan pentadbiran sahaja. Ini akan sejajar dengan kata-kata "*The Government has no business in doing business as the business of the Government is to Govern*".

27. PR-1333-L70573

Dato' Ahmad Fauzi bin Zahari [Setiawangsa] minta **MENTERI DALAM NEGERI** menyatakan apakah tindakan yang dilakukan terhadap rakyat Malaysia yang melarikan diri ke luar negara tetapi dalam masa yang sama menghentam dan melakukan provokasi terhadap isu-isu sensitif negara. Adakah Kementerian bercadang bekerjasama dengan Interpol bagi menahan individu-individu tersebut.

28. PR-1333-L69813

Dato' Haji Mahfuz bin Omar [Pokok Sena] minta **MENTERI KEWANGAN** menyatakan kadar kerugian yang ditanggung oleh Kerajaan dan peniaga akibat daripada kejatuhan nilai RM dan menyatakan apakah pelan tindakan bagi mengatasi kemelut kejatuhan RM dan mengembalikan kepercayaan serta keyakinan pelabur-pelabur dari luar negara.

29. PR-1333-L70748

Tuan Haji Ahmad Nazlan bin Idris [Jerantut] minta **MENTERI KEWANGAN** menyatakan bahawa adakah Kerajaan berhasrat untuk meningkatkan had bacaan meter elektrik dari 300kw kepada yang lebih tinggi bagi pengecualian bayaran GST.

30. PR-1333-L70118

Tuan Haji Nasrudin bin Hassan [Temerloh] minta **MENTERI KEWANGAN** menyatakan jumlah dana asing yang mengalir keluar dari negara ini ekoran daripada penjualan saham-saham oleh pelabur antarabangsa sejak April hingga September 2015.

31. PR-1333-L71408

Dato' Seri Abdul Hadi bin Awang [Marang] minta **MENTERI KERJA RAYA** menyatakan apakah perkembangan pembinaan Lebuhraya Pan Borneo Sarawak:-

(a) berapakah kos pembinaan Lebuhraya Pan Borneo Sarawak; dan

(b) siapakah kontraktor yang mendapat tender projek tersebut dan bagaimanakah proses pemilihan tender dilakukan.

32. PR-1333-L70678

Tuan Tony Pua Kiam Wee [Petaling Jaya Utara] minta **MENTERI KEWANGAN** menyatakan sama ada SRC International membayar RM40 juta pada Disember 2012 dan RM10 juta pada Februari 2013 kepada Ihsan Perdana melalui anak syarikatnya Gandingan Mentari. Adakah *Memorandum and Articles of Association* SRC memerlukan kelulusan bertulis Perdana Menteri untuk segala transaksi utama.

33. PR-1333-L69751
Tuan William Leong Jee Keen [Selayang] minta **MENTERI SUMBER MANUSIA** menyatakan jumlah orang yang terbunuh atau cedera di tapak pembinaan dan tempat-tempat kerja dari tahun 2010 hingga 2015, punca-punca kemalangan dan langkah-langkah yang diambil untuk mengurangkan kemalangan.
34. PR-1333-L69923
Dato' Dr. Tan Kee Kwong [Wangsa Maju] minta **PERDANA MENTERI** menyatakan apakah status terkini dengan saham FGV dan apakah langkah-langkah baik pulih syarikat berkenaan.
35. PR-1333-L70962
Dr. Ong Kian Ming [Serdang] minta **MENTERI KEWANGAN** menyatakan sama ada terdapat apa-apa mekanisme ataupun insentif (contohnya *land swap*) yang ditawarkan kepada Khazanah Nasional supaya projek Tugu Park dan Dataran Muzium yang bernilai RM 1.1 bilion yang mana RM 730 juta ditanggung oleh Khazanah sendiri boleh diusahakan atas prinsip pelaburan tidak berunsur keuntungan (*not for profit*).
36. PR-1333-L71480
Tuan Fong Kui Lun [Bukit Bintang] minta **PERDANA MENTERI** menyatakan apakah kelemahan dan langkah pembaikan yang diambil untuk membanteras kes-kes rompakan kapal minyak oleh lanun-lanun sejak kebelakangan ini.
37. PR-1333-L70335
Tuan Wong Chen [Kelana Jaya] minta **MENTERI DALAM NEGERI** menyatakan sama ada Paul Stadlen mempunyai permit pekerja yang sah untuk bekerja di Malaysia dan jika ya, siapakah majikannya.
38. PR-1333-L69760
Tuan Charles Anthony Santiago [Klang] minta **MENTERI KOMUNIKASI DAN MULTIMEDIA** menyatakan sama ada benar bahawa Kementerian telah membeli alat teknologi daripada *Hacking Team* untuk merisik ke atas rakyat Malaysia. Apakah tujuan Kerajaan untuk merisik ke atas rakyat sendiri.
39. PR-1333-L70922
Puan Kasthuriraani a/p Patto [Batu Kawan] minta **MENTERI DALAM NEGERI** menyatakan bagaimana wujudnya dua kawasan perkuburan yang dipercayai mengandungi mayat mangsa pelarian serta mangsa aktiviti pemerdagangan manusia serta semua langkah-langkah bersekutu yang telah diambil dan yang akan diambil oleh Kerajaan Malaysia untuk menangani isu pemerdagangan manusia memandangkan Malaysia telah menandatangani dan telah meratifikasi *United Nations Convention against Transnational Organized Crime* (UNTOC).
40. PR-1333-L70899
Tuan Loke Siew Fook [Seremban] minta **MENTERI PELANCONGAN DAN KEBUDAYAAN** menyatakan apakah dasar dan langkah-langkah oleh pihak Kementerian untuk membangunkan *cruise tourism* dan bagaimana Swettenham Pier di Pulau Pinang boleh dibangunkan sebagai *home port* untuk syarikat perkapalan antarabangsa.

41. PR-1333-L69836
Tuan Lim Guan Eng [Bagan] minta **MENTERI KEWANGAN** menyatakan kelulusan bank untuk pinjaman perumahan dan berikan pecahan daripada jumlah dan peratus kelulusan untuk setiap tahun sejak 2010. Apakah penolakan permohonan pinjaman perumahan yang meningkat akan menggagalkan usaha pemilikan rumah dan langkah yang diambil untuk melonggarkan pinjaman tersebut.
42. PR-1333-L70870
Tuan Chong Chieng Jen [Bandar Kuching] minta **PERDANA MENTERI** menyatakan apakah status kajian cadangan yang dikemukakan oleh kaum-kaum *native* (kecuali Melayu) di Sarawak supaya dirujuk sebagai satu kaum ia "Bangsa Dayak" termasuk pemindaan definisi "*native*" di Perlembagaan Persekutuan dan klasifikasi segala borang Kerajaan.
43. PR-1333-L70537
Tuan Sim Tze Tzin [Bayan Baru] minta **MENTERI PENDIDIKAN TINGGI** menyatakan apakah PNGK terendah yang mendapat tawaran ke IPTA dalam sesi kemasukan 2015/16. Berapakah pelajar yang mendapat PNGK tersebut.
44. PR-1333-L69971
Dato' Seri Dr. Wan Azizah binti Wan Ismail [Permatang Pauh] minta **MENTERI PERTAHANAN** menyatakan status pesawat MiG-29 TUDM yang dilaporkan tamat tempoh kegunaan pada 2015. Nyatakan program penggantian dan kos yang terlibat serta faktor pemilihan pesawat gantian yang dipersetujui Kerajaan.
45. PR-1333-L70708
Tuan Manivanan a/l Gowindasamy [Kapar] minta **MENTERI DALAM NEGERI** menyatakan :-
- (a) apakah faktor-faktor yang menyekat peguam untuk bertemu dengan banduan atau anak guamannya (*client*) di penjara dan apakah peruntukan undang-undang atau Akta Parlimen yang memberi kuasa kepada Kerajaan Pusat atau pihak Penjara untuk melakukan sedemikian, dan
 - (b) berapakah jumlah tahanan dan tindakan mahkamah yang diambil berkenaan kegiatan di bawah penguatkuasaan Pasukan Tindakan Khas Anti Maksiat, Judi dan Gangsterisme (STAGG) Bukit Aman di setiap negeri untuk tahun 2009, 2010, 2011, 2012, 2013, 2014, dan sehingga 30 September 2015.
46. PR-1333-L70450
Tuan Wong Sze Phin @ Jimmy [Kota Kinabalu] minta **MENTERI DALAM NEGERI** menyatakan statistik mangsa culik di Sabah dan pecahan mengikut wilayah sejak 10 tahun yang lalu.

47. PR-1333-L70601
Tuan Liew Chin Tong [Kluang] minta **MENTERI DALAM NEGERI** menyatakan perbandingan perhimpunan Bersih 4 dan Perhimpunan Baju Merah mengikut:-
- (a) kos atur gerak dan jumlah anggota polis diatur gerak; dan
 - (b) kos dan jumlah air penggunaan meriam air, jumlah kos rawatan anggota polis yang tercedera semasa menyuraikan peserta himpunan baju merah di Jalan Petaling.
48. PR-1333-L70407
Puan Teresa Kok Suh Sim [Seputeh] minta **MENTERI KOMUNIKASI DAN MULTIMEDIA** menyatakan sebab Kerajaan menyekat orang ramai baca laporan di laman web Sarawak Report tetapi tidak mengambil tindakan undang-undang terhadap penyunting dan penulis laman web tersebut sekiranya beliau menyiarkan tulisan yang tidak benar. Sila senaraikan laman web yang telah diharamkan oleh Kerajaan setakat ini.
49. PR-1333-L70433
Datuk Mohd Idris bin Jusi [Batu Pahat] minta **MENTERI SUMBER ASLI DAN ALAM SEKITAR** menyatakan apakah kesan dan akibat yang telah berlaku ke atas persekitaran kesan daripada masalah hakisan yang berlarutan sejak beberapa waktu di sepanjang pantai antara Minyak Beku dengan Rengit dalam Parlimen Batu Pahat. Apakah langkah-langkah yang telah diambil menunjukkan kesungguhan bagi menyelesaikan masalah yang dihadapi rakyat.
50. PR-1333-L71003
Tuan R. Sivarasa [Subang] minta **MENTERI TENAGA, TEKNOLOGI HIJAU DAN AIR** menyatakan jumlah wang tenaga boleh diperbaharui (Renewable Energy Fund) yang telah dikutip daripada pengguna elektrik oleh Tenaga Nasional Berhad bagi pihak *Sustainable Energy Development Authority (SEDA)* bagi tahun 2012, 2013 dan 2014 dan jumlah yang telah dibayar kepada penjana solar kategori individu bersama institusi *non-profit* (agama, NGO dan sebagainya).
51. PR-1333-L69870
Datuk Seri Panglima Haji Abdul Ghapur bin Haji Salleh [Kalabakan] minta **PERDANA MENTERI** menyatakan :-
- (a) secara terperinci sektor manakah pelaburan utama Lembaga Urusan Tabung Haji; dan
 - (b) berapa besar dan bagaimanakah prestasi pelaburan ini.
52. PR-1333-L69541
Dato' Haji Irmohizam bin Haji Ibrahim [Kuala Selangor] minta **MENTERI KEWANGAN** menyatakan sejauh manakah Kerajaan dapat mengawal pasaran gelap yang bermaharajalela selepas GST dilaksanakan yang mana terdapat perniagaan dan pembeli membuat transaksi tanpa rekod walaupun dalam rejim GST semua jualan dan belian mestilah direkodkan dan penyimpanan invois dan resit adalah amat penting.

ATURAN URUSAN MESYUARAT DAN USUL-USUL

1. (D.R. 31/2015) Rang Undang-undang Perbekalan 2016 - **Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang” (2 November, 2015)**

[Menteri Kewangan]

DAN

Usul dibuat oleh YAB Menteri Kewangan dan masalah dicadangkan :-

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari lima puluh dua bilion ringgit (RM52,000,000,000) dibelanjakan daripada Kumpulan Wang Pembangunan bagi tahun 2016, dan bagi tujuan dan butiran perbelanjaan pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2016, yang dibentangkan sebagai Kertas Perintah 42 Tahun 2015, adalah diuntukkan di bawah Maksud-maksud yang berkenaan jumlah-jumlah yang bersestentangan dengan butiran-butiran itu di ruangan enam dan tujuh senarai tersebut.”

Menyambung semula Perbahasan atas masalah (2 November, 2015)

2. (D.R. 32/2015) Rang Undang-undang Kewangan 2015 **Bacaan Kali Yang Kedua**
[Menteri Kewangan]
3. (D.R. 28/2015) Rang Undang-undang Perbadanan Insurans Deposit Malaysia (Pindaan) 2015 - **Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang” (22 Oktober 2015)**
[Menteri Kewangan]
4. (D.R. 30/2015) Rang Undang-undang Syarikat 2015 **Bacaan Kali Yang Kedua**
[Menteri Perdagangan Dalam Negeri, Koperasi dan Kepenggunaan]

5. (D.R. 29/2015) Rang Undang-undang Skim Kepentingan 2015. “

**[Menteri Perdagangan Dalam Negeri,
Koperasi dan Kepenggunaan]**
6. (D.R. 9/2015) Rang Undang-undang Kanun Tatacara Jenayah (Pindaan) 2015 “

[Menteri Dalam Negeri]
7. (D.R. 12/2015) Rang Undang-undang Keterangan (Pindaan) 2015 “

[Menteri di Jabatan Perdana Menteri]
8. (D.R. 24/2014) Rang Undang-undang Dadah Berbahaya (Pindaan) (No. 2) 2014 “

[Menteri Kesihatan]

9. PR-1333-U69963

Datuk Dr. Makin @ Marcus Mojigoh [Putatan] akan mencadangkan:-

“Bahawa Dewan ini mengambil maklum bahawa sejak akhir-akhir ini, dan Gerakan Sabah-Sarawak keluar Malaysia (SSKM) kian mendapat perhatian dan sokongan dari sebilangan kecil rakyat dari kedua-dua negeri ini. Bahawa Dewan ini mengambil maklum bahawa, terdapat rungutan-rungutan di kalangan rakyat negeri Sabah dan Sarawak dalam beberapa isu yang mereka fikirkan bahawa hak mereka, seperti yang dijanjikan dan terkandung dalam Perjanjian Malaysia 1963 telah dicabuli atau tidak ditunaikan. Dan mengambil maklum juga, antara isu utama yang disuarakan dalam rungutan ini adalah banjir pendatang asing ke negeri Sabah dan di tambah buruk pula dengan pemberian status warga Negara kepada mereka ini. Dan mengambil maklum juga bahawa, setiap kali isu 20 perkara (bagi Negeri Sabah) dan 16 perkara (bagi Negeri Sarawak) dalam Perjanjian Malaysia ini disuarakan, terdapat usaha-usaha pihak tertentu untuk mensenyapkan isu ini dan akhirnya rungutan-rungutan ini menjadi satu gerakan ketidakpuasan hati rakyat. Dan mengambil maklum juga bahawa, gerakan ketidakpuasan hati rakyat ini telah sampai satu tahap di mana mereka secara terbuka mengelarkan diri mereka sebagai aktivis Sabah-Sarawak keluar Malaysia atau ringkasnya SSKM. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Kita maklum bahawa, mengambil tindakan Undang-undang semata-mata untuk menghalang mereka ini bagi menyuarakan rungutan mereka ini tidak akan menyelesaikan isu yang ditimbulkan, malah akan merumitkan keadaan lagi di mana mereka akan semakin mendapat simpati daripada kalangan rakyat yang lainnya sementara Kerajaan pula dianggap sebagai tidak perihatin dan kuku besi.

Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara Holistik termasuklah menjemput dan mendengar rungutan mereka yang menggelarkan diri mereka sebagai SSKM ini.”

[Menteri Dalam Negeri]

10. PR-1333-U69964

Datuk Dr. Makin @ Marcus Mojigoh [Putatan] akan mencadangkan:-

“Bahawa Dewan ini mengambil maklum bahawa, terdapat rungutan-rungutan dikalangan rakyat bahawa sejak akhir-akhir ini, perpaduan, keharmonian, kesejahteraan dan kerjasama antara rakyat negara ini yang terdiri dari berbilang kaum dan agama telah terhakis. Dan mengambil maklum juga, antara isu utama menyebabkan perkara ini berlaku kerana terdapat golongan tertentu yang memainkan isu bangsa dan agama sewenang-wenangnya serta rakyat merasakan tidak ada tindakan tegas yang diambil bagi menangani masalah ini. Dan mengambil maklum juga bahawa, Perhimpunan Bersih 4 dan Perhimpunan Rakyat Bersatu baru-baru ini telah menanamkan bibit kebencian serta syak wasangka antara kaum di negara ini. Dan mengambil maklum juga bahawa, Rukun Negara sebagai tonggak perpaduan, keharmonian, kesejahteraan dan kerjasama antara rakyat negara ini secara tidak langsung tidak lagi dihormati dan dipatuhi. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara Holistik termasuklah menjemput dan mendengar rungutan mereka ini. Kerajaan juga hendaklah menguatkuasakan segala peruntukan Undang-undang yang ada bagi menghalang mana-mana demokrasi atau perjumpaan umum yang membangkitkan isu bangsa dan agama, yang boleh menggugat perpaduan, keharmonian, kesejahteraan dan kerjasama antara rakyat negara ini.”

[Perdana Menteri]

11. PR-1333-U69965

Datuk Dr. Makin @ Marcus Mojigoh [Putatan] akan mencadangkan:-

“Bahawa Dewan ini mengambil maklum bahawa, terdapat laporan mengatakan bahawa operasi bot lautan dalam yang beroperasi di negara ini tidak mendatangkan faedah kepada negara ini secara total. Dan mengambil maklum juga, antara isu utama yang disuarakan dalam laporan ini adalah, para pengusaha bot lautan dalam ini menjual minyak diesel bersubsidi kepada bot-bot asing. Dan mengambil maklum bahawa, terdapat juga laporan bahawa tangkapan bot lautan dalam ini dijual kepada nelayan asing yang menawarkan harga yang lebih baik. Dan mengambil maklum juga bahawa, kedua-dua aktiviti yang disebutkan ini telah mendatangkan kerugian yang besar kepada negara ini, sama ada dari segi subsidi diesel mahupun dari segi tangkapan hasil lautan di negara ini dijual ke negara asing.

Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu sistem kawalan yang bersepadu bagi memastikan bahawa semua diesel bersubsidi digunakan dengan niat asal serta tangkapan tersebut hendaklah dipasarkan di negara ini.”

[Menteri Pertanian dan Industri Asas Tani]

12. PR-1333-U69966

Datuk Dr. Makin @ Marcus Mojigoh [Putatan] akan mencadangkan:-

“Bahawa Dewan ini mengambil maklum bahawa, isu 1MDB telah mencemarkan nama baik Kerajaan dan Negara Malaysia pada umumnya. Dan mengambil maklum juga, isu 1MDB telah sedikit sebanyak menghakis kepercayaan pelabur asing kepada Sistem Pelaburan di Negara ini. Dan mengambil maklum juga bahawa, isu 1MDB telah disensasikan melalui media sosial, media elektronik dan media asing dengan sewenang-wenangnya yang menggambarkan bahawa syarikat milik Kerajaan ini hampir muflis dan liabilitinya perlu ditanggung oleh Kerajaan. Dan mengambil maklum juga bahawa, hasil daripada kemuskilan ini, rakyat pada umumnya mempersoalkan cara kerja Kerajaan mentadbir 1MDB sehingga mengalami kerugian yang besar dan terpaksa menanggung liability 1MDB. Maka, bagi menangani masalah ini, Dewan Yang Mulia ini hendaklah mengambil ketetapan bahawa, Kerajaan hendaklah memperjelaskan secara terperinci mengenai model perniagaan 1MDB kepada umum agar satu gambaran yang telus dapat mereka perolehi serta mengembalikan kebolehpercayaan rakyat kepada Kerajaan masa kini.”

[Menteri Kewangan]

13. PR-1333-U70485

Tuan Ng Wei Aik [Tanjong] akan mencadangkan:-

“Bahawa Dewan Rakyat ini mengambil ketetapan untuk mengutuk Perhimpunan Rakyat Bersatu yang diadakan pada 16 September 2015 yang sifatnya berbau perkauman serta bertujuan mengapi-apikan sentimen perkauman, termasuk menuntut supaya sekolah-sekolah Cina ditutup, menggelar anggota-anggota polis yang bertugas sebagai “barua Cina”, cuba menimbulkan kekecohan di Jalan Petaling serta mempersoalkan keperluan “Little India” diwujudkan dan tindakan-tindakan yang sewajarnya harus diambil terhadap pihak penganjur dan pihak-pihak yang harus bertanggungjawab.”

[Menteri Dalam Negeri]

14. PR-1333-U70272

Tuan M. Kulasegaran [Ipoh Barat] akan mencadangkan:-

“Bahawa Dewan ini mengambil maklum demi kepentingan negara dan masyarakat sejagat pandangan serius terhadap kestabilan ekonomi dan kemajuan negara harus diberi perhatian sepenuhnya. Oleh yang demikian Dewan ini perlu mengambil maklum mengenai perkara ini dan mengarahkan Kerajaan untuk mengatasi masalah ini.”

[Perdana Menteri]

15. PR-1333-U70255

Dr. Tan Seng Giaw [Kepong] akan mencadangkan:-

“Bahawa Menteri Kewangan membincangkan cara-cara yang diambil untuk mempertahankan nilai ringgit.”

[Menteri Kewangan]

16. PR-1333-U70256

Dr. Tan Seng Giaw [Kepong] akan mencadangkan:-

“Bahawa Menteri Sumber Asli dan Alam Sekitar mendebatkan masalah jerebu di rantau in.”

[Menteri Sumber Asli dan Alam Sekitar]

17. PR-1333-U71552

Tuan Fong Kui Lun [Bukit Bintang] akan mencadangkan:-

“Bahawa Kerajaan mempergiatkan usaha untuk menyatu padukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 58 tahun lalu supaya mereka boleh hidup dengan aman dan saling memerlukan dan memahami bagi memudahkan mereka membangunkan ekonomi negara secara bersama dan merealisasikan impian Malaysia.”

[Perdana Menteri]

18. PR-1333-U71553

Tuan Fong Kui Lun [Bukit Bintang] akan mencadangkan:-

“Bahawa Kerajaan memulihkan pilihan raya Kerajaan Tempatan seluruh negara supaya urus tadbir Kerajaan menjadi cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat.”

[Menteri Kesejahteraan Bandar, Perumahan dan Kerajaan Tempatan]

19. PR-1333-U69805

Dato' Kamarudin bin Jaffar [Tumpat] akan mencadangkan:-

“Bahawa Dewan ini memutuskan untuk Malaysia menerima masuk, memberi perlindungan dan akhirnya memberikan taraf kewarganegaraan kepada 1000,000 orang rakyat negara Syria daripada jutaan orang yang sekarang menjadi pelarian di Turki dan Eropah.”

[Perdana Menteri]

20. PR-1333-U69806

Dato' Kamarudin bin Jaffar [Tumpat] akan mencadangkan:-

“Bahawa Dewan ini merakamkan perasaan sedih dan kecewa bahawa perjalanan kerja-kerja Jawatankuasa Kira-kira Wang Negara (PAC) telah tergendala oleh beberapa sebab dan dengan ini memutuskan untuk meminta Tuan Yang di Pertua Dewan Rakyat dengan segera melicinkan semula perjalanan Jawatankuasa itu.”

[Perdana Menteri]

21. PR-1333-U69807

Dato' Kamarudin bin Jaffar [Tumpat] akan mencadangkan:-

“Bahawa Dewan ini amat tidak berpuas hati dengan kemajuan pembinaan rumah-rumah untuk mangsa banjir negeri Kelantan. Oleh itu Dewan ini mendesak Kerajaan Pusat berusaha dengan lebih gigih lagi bersama dengan Kerajaan Negeri Kelantan untuk melipatkali ganda usaha pembinaan rumah-rumah tersebut.”

[Perdana Menteri]

22. PR-1333-U70769

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, hubungan antara kaum mutakhir ini makin meruncing dan jika tidak dibendung akan mencapai tahap amat merbahaya dan akibatnya negara akan hancur seperti yang terjadi di negara-negara lain yang sedang bergolak akibat isu perkauman. Bila rakyat Malaysia berbangsa Dayak, Kadazan, Orang Asal, Cina, Melayu, Jawa, Bugis atau apa suku kaum sekalipun mengkritik dan mempersoalkan hal tatakelola Negara dan kepimpinan Perdana Menteri dan Kabinetnya, rakyat tidak mempersoalkan ras Perdana Menteri. Rakyat mempersoal Perdana Menteri atas kapasiti beliau sebagai Ketua Eksekutif Negara. BERSIH 4.0 menganjurkan demo jalanan kerana mendesak Perdana Menteri memberi jawapan kepada banyak persoalan yang tidak terjawab.

Soal 1MDB, Derma RM 2.6 bilion, Pertukaran Pegawai-pegawai SPRM, Penamatan khidmat Tan Sri Gani Patail sebagai Pendakwa Raya, pembebasan Abdul Razak Baginda yang rapat dengan Perdana Menteri dalam kes pembunuhan Altantuya Shaaribuu yang amat memalukan negara dan banyak lagi isu yang amat-amat mendesak yang tidak dijawab oleh Perdana Menteri secara meyakinkan. Untuk itu Kerajaan mesti membezakan mengkritik Perdana Menteri bukan mengkritik bangsa Perdana Menteri tetapi kerana Perdana Menteri adalah Ketua Eksekutif Negara yang sememangnya boleh dikritik yang dibenarkan oleh sistem pemerintahan yang diamalkan di negara ini.”

[Perdana Menteri]

23. PR-1333-U70770

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, bila UMNO dan NGO yang menyokong UMNO menganjurkan demo jalanan bertemakan Himpunan Maruah Melayu pada 16 September 2015 yang kemarahan disasarkan kepada rakyat kaum Cina, yang dikatakan mendominasi Himpunan BERSIH 4.0 pada 29 dan 30 Ogos 2015, penganjur memilih kaum Cina sebagai fokus serangan. Penganjur membawa posters dan banners tertulis kata-kata provokasi dan perkauman yang amat merbahaya seperti “Ini Tanah Melayu, Cina boleh keluar”. “Bawa parang dan keris. Tetak Cina. Umno perlukan anda”. Sedangkan yang keluar dijalanan pada 29 dan 30 Ogos 2015 rakyat dari berbagai kaum termasuk Melayu dan Bumiputra yang lain. Kaum lain selain Cina juga menyuarakan perasaan tidak puas hati mereka terhadap Perdana Menteri. Di mana yang dikatakan Cina menghina Melayu dan Maruah Melayu dicabar. Kerajaan mesti berjiwa besar. Walaupun Kerajaan Barisan Nasional diterajui oleh UMNO dan Melayu tetapi rakyat negara ini terdiri dari berbagai bangsa yang wajib dilindungi dan dihormati.”

[Perdana Menteri]

24. PR-1333-U70772

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, penyakit Denggi akibat jangkitan nyamuk di Malaysia telah mencapai satu tahap yang merbahaya. Lebih parah kematian akibat penyakit ini sudah diterima sebagai satu yang lumrah dan tidak ada rasa bersalah oleh pemerintah. Kerajaan sepatutnya menubuhkan satu institusi khas bagi melawan wabak ini dengan memberikan peruntukan kewangan yang secukupnya serta membekalkan berbagai pakar bagi menjadikan institusi ini betul-betul memberi tumpukan dan perhatian kepada masalah yang begitu lama tidak dapat diselesaikan. Malaysia mesti memainkan peranan utama dan boleh menjadi juara dalam memerangi penyakit ini bukan sahaja di rantau ini malah di dunia. Kerajaan mesti serius dan komited dalam hal ini.”

[Menteri Kesihatan]

25. PR-1333-U70774

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, Kementerian Belia dan Sukan banyak memberi tumpuan kepada pembangunan sukan tetapi meninggalkan pembangunan belia di belakang. Setiap tahun ribuan anak-anak Malaysia yang keluar dari sekolah dan ramai yang tidak melanjutkan pelajaran ke pengajian tinggi atas berbagai sebab dan alasan. Akibat tidak ada program wajib yang mesti diikuti dan disertai oleh mereka, mereka menjadi satu eset yang amat bernilai yang terbiar dan tidak dimanfaatkan sepenuhnya. Adalah dicadangkan anak-anak ini, didaftarkan dan diwajibkan menyertai Khidmat negara selama dua tahun seperti yang dilakukan dikebanyakkan negara. Semasa dalam program ini, pilih dua atau tiga bidang ilmu yang boleh memberi menafaat berterusan bila mereka tamat program nanti. Sebagai contoh, ilmu motor mekanik dan elektrik. Selepas dua tahun mereka boleh berdikari dan bantuan susulan boleh diusahakan. Untuk memastikan program ini berjaya ianya mesti dilaksanakan sebagai program wajib dan dikembangkan dengan elemen ketenteraan.”

[Menteri Belia dan Sukan]

26. PR-1333-U70776

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, kegiatan merempit oleh anak-anak muda khasnya anak Melayu amat memalukan bangsa dan Kerajaan. Kerajaan seolah-oleh tidak ada jawapan pada permasalahan ini. Mereka yang merempit bukan sahaja membahayakan nyawa mereka juga nyawa orang awam. Adalah dicadangkan pihak polis menggunakan anggota Cawangan Khas bagi meninjau dan kenal pasti ketua kumpulan ini dan menahan mereka atas undang-undang yang sedia ada. Penahanan mereka hendaklah dihebahkan dalam akhbar dan media elektronik. Menahan mereka untuk beberapa malam di lokap dan jika ada bukti yang cukup mendakwa mereka di mahkamah akan menghantar mesej yang jelas bahawa kegiatan mereka amat merbahaya dan amat dibenci oleh masyarakat. Ini mesti dilakukan secara konsisten bukan berkala.”

[Menteri Dalam Negeri]

27. PR-1333-U71195

Tuan Hee Loy Sian [Petaling Jaya Selatan] akan mencadangkan:-

“Bahawa Dewan ini mengemukakan Undi Tidak Percaya terhadap Perdana Menteri Datuk Seri Najib Tun Razak atas alasan penerimaan “Wang Derma” berjumlah RM2.6 billion yang pada mulanya dinafikan, kemudiannya mengugut untuk menyaman akhbar Wall Street Journal dan akhirnya mengakui wang tersebut diperolehi daripada individu yang berasal dari Timur Tengah.

Dengan tidak menjelaskan mengapa “Wang Derma” ini dimasukkan ke akaun peribadi dan bukan atas nama parti, Dewan juga tidak berpuas hati ke atas siasatan skandal 1MDB yang berlaku di mana “Special Task Force” yang sepatutnya menyiasat skandal ini dibubarkan tanpa memberi sebarang alasan sehingga Peguam Negara Tan Sri Abdul Gani Patail ditamatkan perkhidmatan, pegawai SPRM dipindahkan, pihak polis mengganggu siasatan SPRM dan Bank Negara, Public Account Committee (PAC) yang sedang menjalankan siasatan terhadap kes 1MDB tidak berfungsi akibat daripada empat anggota PAC yang terbabit telah dilantik menjadi Menteri atau Timbalan Menteri oleh Perdana Menteri, Pengarah Cawangan Khas (SB) diberhentikan, Timbalan Pengarah Cawangan Khas dipindahkan ke Jabatan Perdana Menteri tanpa diberi tugasan. Disebabkan masalah yang dinyatakan, Perdana Menteri Datuk Seri Najib Tun Razak telah menjejaskan imej Negara di dunia dan menyebabkan pelabur tidak yakin terhadap Kerajaan sekarang sehingga ekonomi menjadi tidak stabil, serta pasaran saham menjunam teruk dan kejatuhan nilai wang ringgit Malaysia berbanding dengan dolar Amerika Syarikat. Maka rakyat Malaysia tidak lagi percaya terhadap Perdana Menteri dan dengan ini Dewan hendaklah mengambil ketetapan untuk mengemukakan Undi Tidak Percaya terhadap Perdana Menteri.”

[Perdana Menteri]

28. PR-1333-U70806

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gegaja pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu dikedatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama.”

[Menteri Kesejahteraan Bandar, Perumahan dan Kerajaan Tempatan]

29. PR-1333-U70808

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan.”

[Menteri Dalam Negeri]

30. PR-1333-U70809

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia.”

[Menteri Pendidikan]